



# e-bilten

OPĆINA TEŠANJ

www.opcina-tesanj.ba

e-mail: fuad.sisic@opcina-tesanj.ba

Ponedjeljak

12.03.2012

Broj 64

1. Švicarska - država reda
2. Dan nezavisnosti - 20 godina
3. Raskrsnica Jelah
4. Srušen nelegalni objekat
5. Urbanističko rješenje CENTAR, Tešanj

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: fuad.sisic@opcina-tesanj.ba  
Molimo vas da ovaj elektronski bilten prosljedite svim zainteresiranim u našoj općini. Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću.  
Sa zadovoljstvom očekujem vaše komentare, sugestije i primjedbe.

Molim da ne prinate ovaj sadržaj. Za svaki nepotrebno odštampan papir mora se bez potrebe oboriti drvo koje raste!

## Švicarska - država reda

Unus pro omnibus omnes pro uno (lat.)

Un pour tous, tous pour un (fra.)

("Svi za jednoga, jedan za sve")

**U ime svemogućeg Boga** (In the Name of Almighty God), ovim riječima počinje Ustav Konfederacije Švicarske. U članu 2. Ustava, piše: **Cilj Saveza je da očuva spoljašnju nezavisnost otadžbine, da održi unutrašnju red i mir, da zaštiti slobode i prava konfederacije i da zajednički promovira svoj prosperitet.** Član 4: Svi švicarski građani su **jednaki pred zakonom.** U Švicarskoj niko neće biti ni podvrgnut, ni privilegovan zbog mjesta, rođenja, bilo koga ili porodice. Član 6: Svi posebni savezi i svi ugovori političke prirode između kantona su zabranjeni.

Za razliku od starog ustroja, Švicarska je 1848. godine postala savezna država u kojoj savezno izglasani zakoni obvezuje sve kantone. Vojska, vanjska politika, carine, pošta, željeznice...postaju stvar saveznih organa. Savezna zakonodavna vlast je dvodomni parlament: u Domu kantona su po dva zastupnika (iz svakog od 22 kantona), a u Predstavnički dom bira se direktno po jedan zastupnik na svakih 20 tisuća stanovnika.

Danas Švicarska ima dvadeset saveznih kantona i šest podkantona. Prema popisu iz 1970. godine 64,9% stanovnika govori njemački, 18,1% francuski, 11,9% talijanski i 0,8% retoromanski (4,3% otpada na ostale jezike). Prema popisu iz 2009. godine u Švicarskoj živi 8.000.000 stanovnika. BDP po stanovniku je 32.300 \$ bio 2005. godine. Nezavisnost: 01. august 1291. godine.

Tragovi ljudskih naselja na području Švicarske potječu iz ranog paleolita. U 2. stoljeću naseljavali su zapadni dio zemlje kelti Helveti, koji su ratovali s Rimom, i nakon Cezarove pobjede kod Bibracte potpali pod njegovu vlast. U 3. i 4. stoljeću istočnu Švicarsku počinju zaposjedati Alemanni, a zapadni su dio u drugoj polovici 5. stoljeću zauzeli Burgundi. Od 6. stoljeća Švicarska je uz prekide bila u sastavu franačke države. Od 11. do 13. stoljeća gotovo su cijelim teritorijem sjevernim od Ženevskog jezera vladali grofovi, poslije vojvode od Zahringena. U drugoj polovici 12. stoljeća dominiraju u jugozapadnom dijelu zemlje grofovi Savojski, a na sjeveroistoku grofovi Habsburški. Za vrijeme Prvog svjetskog rata neutralnost Švicarske nije bila ugrožena. Švicarska je **1920. stupila u Ligu naroda**, zadržavši i dalje položaj neutralne zemlje. Za vrijeme Dru-



gog svjetskog rata Švicarska je održala svoju neutralnost pomažući prvo na obje strane, a kasnije samo Njemačku i Italiju. 1946. godine uspostavljeni su diplomatski odnosi sa Sovjetskim Savezom. Švicarska nije tražila primanje u UN, jer joj je priznat status stalno neutralne države. **Na referendumu 1959. godine odbijen je prijedlog da žene dobiju pravo glasa.** Godine 1960. Švicarska je pristupila Europskom udruženju za slobodnu trgovinu (EFTA). 1971. godine žene su dobile pravo glasa. Švicarska je ušla u UN 10. rujna 2002. (odlukom A/RES/57/1).<sup>[1]</sup> Krajem 2008. godine Švicarska je postala i punopravna članica Schengenskog prostora.



Nedavno sam boravio u Švicarskoj kod naših građana koji su uspjeli organizirati se u kratkom vremenu (20 godina) i u tom vremenu pružiti značajnu podršku odbrani Bosne i Hercegovine, i organizirati zajednicu Bošnjaka u Švicarskoj. Podsjećam ili iznosim za one koji nisu znali, prvi konvoj humanitarne i novčane pomoći nakon deblokade "tešanjsko-maglajskog džepa", 26.03.1994. godine stigao je iz Švicarske, **Kanton Zug**, na čelu sa g-dinom Zuhdijom Bešo.

Švicarska je uređena država i uređeno društvo. Ratovali su dugo, niko ne postavlja pitanje kada su stanovnici koji su nekada živjeli u Švicarskoj prihvatili kršćanstvo. Protestanti i katolici su poslednji koji su vodili iscrpne ratove između kantona. Nekada su jedni pobjeđivali, nekada drugi. A jednog dana su sjeli i dogovorili se. Utvrdili Ustav koji Švicarsku ne dovodi u pitanje, niti ijedan kanton. Našli su mjeru, i više od 150 godina na temelju modernog Ustava uređuju i izgrađuju svoje društvo i državu Švicarsku. Svi imaju punu slobodu, i svi imaju nužnu odgovornost. Život se čini lahkim u Švicarskoj, čini se da je dovoljno stati u red i sve dolazi po ranije utvrđenom redu. Niti ima potreba, niti bi moglo preko reda. Gledao sam uređenu društvo, i razmišljajući se pitao: Dragi Bože, može li i hoće li Bosna i Hercegovina ikada biti uređeno društvo? I odgovorio sam samom sebi: hoće, naravno da hoće, samo da dođemo do praktičnog životnog okvira u Bosni i Hercegovini, do praktičnog Ustava i počnemo izgradnju našeg društva i Bosne i Hercegovine kako to Dragi Bog zapovijeda. Uz to, Bosna i Hercegovina nije nikada na referendumu zabranila ženama da imaju pravo glasa!

## DAN NEZAVISNOSTI BiH - 20 GODINA

*Nije mnogo, ali veoma dragocjeno!*

Istina je: Bosna i Hercegovina je preživjela 20 godina neovisnosti. Nije puno u životu jedne države, ali u okruženju u kakvom je Bosna i Hercegovina, itekako je dragocjeno. Međunarodna arbitražna komisija za Ex Jugoslaviju je odredila demokratski princip razriješenja krize u SFRJ: referendum. Pitanje: **"Jeste li za suverenu i nezavisnu Bosnu i Hercegovinu, državu ravnopravnih građana, naroda BiH - Muslimana, Srba, Hrvata i pripadnika drugih naroda koji u njoj žive?"** Rezultat referenduma je bio pozitivan. Hrvati su morali glasati "ZA" jer je Hrvatska već bila izašla iz Jugoslavije, Bošnjaci isto tako "ZA" jer bi ostanak značio ostanak u Velikoj Srbiji, Srbi nisu morali glasati "ZA", i uglavnom nisu. A i da jesu, ništa ne bi promijenilo jer je već 08. januara uspostavljena Skupština Srpskog naroda. I da je na referendum izašlo 90% građana, i da su svi glasali ZA, sve ukazuje na to da bi događaji nastavili u istom smjeru.





SDS podržan režimom Slobodana Miloševića i JNA je imao spreman odgovor na građanski referendum: **rušenje Ustava Republike Bosne i Hercegovine i preuzimanje vlasti silom**. Zaokružen je prostor unutar Republike Bosne i Hercegovine pod imenom Srpska Republika Bosna i Hercegovina. Uspostavljena nasilna vlast, i počela sa progonom Bošnjaka i Hrvata koji se nisu imali čime braniti. Uspostavljenim nasilnim koceptom vlasti, nije samo iskazano neslaganje sa referendumom, nego je promovisan velikodržavni projekat Velike Srbije na teritoriji Republike Bosne i Hercegovine. Ubrzo je uspostavljena Herceg-Bosna i HVO, opet rušenjem Ustava RBiH, na sličan način i sa veoma sličnim ciljevima. Nisu se birala sredstva, sve je bilo dopušteno, sve do samog genocida.

Oni koji su priznali Bosnu i Hercegovinu su donosili rezolucije i posmatrali. Na kraju, ko zna iz kojih razloga su natjerali Hrvate da sa Bošnjacima prihvate Federaciju BiH, a zatim Hrvate i Bošnjake da prihvate Republiku Srpsku unutar Bosne i Hercegovine. Sve to uz potpise velikih svjetskih sila, ali i potpise susjednih država Srbije i Hrvatske čiji režimi su činili mnogo toga da Bosna i Hercegovina nestane. Stoga 20 godina nezavisnosti Bosne i Hercegovine je itekako značajno vrijeme ako znamo da su među garante opstanka Bosne i Hercegovine uvedeni od strane svjetskih sila njeni rušitelji. Absurdno i tužno da apsurdnije teško može biti. Može tužnije, ali vjerujemo da neće. Kada se sva muka ove naše domovine Bosne i Hercegovine stavi na jednu stranu, a naša nužda na drugu stranu, naša nužda će prevagnuti. Mi druge domovine osim Bosne i Hercegovine nemamo, stoga će Bosna i Hercegovine živjeti jer svi domoljubi i sav njen narod ne mogu nestati.

## RASKRSNICA JELAH

*Konačno bi se mogla dogoditi akcija!*



Od 12. januara 2009. godine teku neprekidno nastojanje Općine Tešanj da se riješi pitanje najvećeg saobraćajnog problema na području cijele općine - raskrsnica Jelah. Općina Tešanj je preuzela na sebe obavezu izrade i finansiranja projektne dokumentacije kako bi se stvari brže odvijale, ali uprkos svemu, zbog neposredne nadležnosti viših nivoa vlasti (M4-Direkcija za ceste FBiH i R474 - Direkcija za ceste ZDK) saglasnosti su dobivene veoma sporo, a dugo vremena osporavane. Na kraju se stiglo do rješenja sa semaforima kao rješenja na koja je federalna direkcija bila spremna dati saglasnost (20.10.2011. godine Općina Tešanj zaprimila to rješenje). Ostala je još vodna saglasnost (u toku izdavanje) i rješavanje imovinsko-pravnih odnosa (u toku) za novu saobraćajnicu, kako bi se izdala građevinska dozvola. Općina Tešanj je obavještena od strane Direkcije cesta FBiH o spremnosti finansiranja u 2012. godine u iznosu od 220.000,00 KM, te je Općina Tešanj organizirala sastanak 07.03.2012. godine u Ministarstvu prostornog uređenja, prometa i komunikacija i zaštitu okoliša ZDK sa početkom u 10,00 sati svih zainteresovanih strana. Kantonalno ministarstvo je prihvatilo obavezu da vodi postupak javne nabavke, a Direkcija cesta FBiH i Općina Tešanj će biti sufinansijeri i potpisnici ugovora o realizaciji raskrsnice Jelah. Sporo, ali ipak se kreće. Ovim rješenjem, pored semafora na sadašnjoj raskrsnici Jelah, dobićemo još jednu saobraćajnicu iz pravca Piljužića pored sadašnjeg Doma kulture i novu raskrsnicu na spoju sa M4.



## SRUŠEN NELEGALNI OBJEKAT


*Vlast funkcionise, polahko ali istrajno!*

Uvijek je bilo nelegalnih objekata, i uvijek je bilo nepoštivanja društvenih normi i pravila. Dokle će tako biti ne znam, ali nema sumnje da ambijent u tom smislu ide ipak u pozitivnom smjeru. Nelegalni objekat kod policijske stanice u Tešnju bio je tema neformalnih i formalnih rasprava, predmet inspekcijskog nadzora i vijećničkih rasprava. Na kraju, kada su iscrpljene sve pravne mogućnosti, i rješenje o uklanjanju objekta postalo pravosnažno i sam investitor je shvatio pogrešan korak, te uklonio objekat. Bilo je mnogo onih koji su sumnjali u ovakav ishod, čak otvoreno optuživali, ali se pokazalo ispravnim da samo istrajan rad donosi rezultat. Pravne procedure su često složene, demokratski sistem sam po sebi omogućuje svakom mehanizme da štiti ono što misli da je njegovo pravo, ali na kraju se rezultat mora poštovati bez obzira je li neko zadovoljan ili nije. Upravo iz tog razloga ovaj primjer ističem, jer upravo na ovom primjeru je pokazana ta vrsta zrelosti ili izrastanja naše lokalne zajednice. Ovakvi primjeri će biti primjeri dobre prakse, pouka na kome će se graditi budući odnosi i poštivanje pravila i normi.

## URBANISTIČKO RJEŠENJE "CENTAR", TEŠANJ

*I hotel u gradu, konačno!*

Još jedan primjer istrajnosti. Započeli smo 2009. godine na izradi urbanističkog rješenja za lokaciju starog hotela "Zvečaj" u Tešnju. Nakon godinu dana smo dobili rješenje prihvatljivo za investitora, sadašnjeg vlasnika objekta, ali ne i za pozitivan ambijent u Vijeću. Jedni su bili za ponuđeno rješenje, drugi apsolutno protiv ustupaka investitoru u pogledu njegovih interesa, treći su bili protiv u pogledu veličine prostora za smještaj hotelskih gostiju. I morali smo stati, ali ne odustati. Nakon nekog vremena krenuli smo iz početka. Došli smo do rješenja koje je osiguralo pozitivan ambijent u Vijeću, podrška svih stranaka, ali je investitor (vlasnik) imao ozbiljne prigovore. Ponovo smo bili u dilemi, zastali i ponovo krenuli dalje. Omogućili smo investitoru da na temelju onoga što je Vijeću bilo prihvatljivo ponudi izmjenjeno rješenje, ali sa projektantskom kućom koja je izradila početno rješenje i u koordinaciji sa Općinom. Potrošili smo dodatnih nekoliko mjeseci, ali evo konačno smo stigli na stazu za početak gradnje. Dilema više nema, imamo rješenje, odluku Vijeća i pozitivan ambijent. Sada je do investitora. Općinska administracija je spremna u nekoliko dana izdati urbanističku saglasnost, isto tako i građevinsku dozvolu nakon dostavljenog izvedbenog projekta. A i investitor (vlasnik) kaže da je spreman, da se intenzivno priprema za početak radova. Po svemu ovome bi do kraja godine gosti koji dolaze u Tešanj na konak mogli konačiti u novom objektu na sadašnjoj lokaciji. Nadamo se da i hoće. Sretno!



Općinski načelnik  
Fuad Šišić

